

## Оламда Аллоҳнинг дини бирдир



23:40 / 02.12.2016 5548

Осмону ерда Аллоҳнинг дини бирдир. У-Ислом динидир. Аллоҳ таоло: «**Албатта, Аллоҳнинг наздидаги дин-Исломдир**», деган. (Оли Имрон сураси, 19) ва яна «**Ва сизларга Исломни дин, деб рози бўлдим**», деган. (Моида сураси, 108) У-ҳаддан ошиш ва камчиликка йўл қўйиш ўртасидадир. Ташбех (ўхшатиш) ва Таътийл (амалдан қолдириш) ўртасидадир. Жабр ва қадар ўртасидадир. Амн (хотиржамлик) ва Ийяс (умидсизлик) ўртасидадир.

**Шарҳ:** Яъни, Аллоҳга ибодат қилиш йўли, дастури ва низоми ердаю осмонда бирдир. Аллоҳнинг ерда шериги йўқ бўлганидек, осмонда ҳам шериги йўқдир. У ерда ҳам, осмонда ҳам Ўзидан бошқага ибодат қилишни жоиз қилмас. Шунингдек, Мухаммад соллаллоҳу алайҳи васаллам ерда хотаминнабиййин бўлганлариdek, осмонда ҳам хотаминнабиййиндиrlар. **«Лаа илаҳа иллаллоҳ, Муҳаммадун Расулуллоҳ»** калимаси ила таъбир қилинадиган Ислом дининг асоси шудир.

Имом ат-Таховий Оли Имрон ва Моида сураларидан биттадан оятни далил келтирдилар.

Сўнгра Исломнинг хусусияти ва фазлини баён қилиб: «У-ҳаддан ошиш ва камчиликка йўл қўйиш ўртасидадир..» деб айтиб ўтдилар.

### ДИН БИР, ШАРИАТЛАР ТУРЛИДИР

Абу Хурайра розияллоҳу анҳудан ривоят қилинган саҳих ҳадисда событ бўлишича, Пайғамбаримиз соллаллоҳу алайҳи васаллам: «Биз- Анбиёлар

жамоасининг, динимиз биридир»-деганлар. (Аҳмад ривоят қилган). Аллоҳ таоло Қуръони каримда: «**Ким Исломдан бошқа динни хоҳласа, ҳеч ундан қабул қилинмас**», (Ол-и Имрон сураси, 58) деган. Шунга биноан, ҳамма замонларда, дин битта, Ислом дини бўлган. Лекин шариатлар турли бўлиб келган. Бунга Аллоҳ таолонинг «Сизлардан ҳар бирингизга шариат ва йўл қилиб қўйдик», (Моида сураси, 48) деган ояти далолат қиласди.

Дин асл нарсалардан иборат бўлиб, у-биттадир. Шариат эса, фаръ нарсалардан, амал қилиш йўлларидан иборат бўлиб, турличадир.

Ислом-Аллоҳ таоло Ўз бандаларига, Ўз пайғамбарлари орқали юборган кўрсатмалари тўпламидир. Бу диннинг асли ҳам, фарълари ҳам Пайғамбарлар томонидан ривоят қилингандир. Дин жуда ҳам очиқ-ойдин нарсадир. Унга ҳар бир вояга етган, каттаю кичик, фасийху ажам, закийю нозакий тездагина кириши мумкин. Лекин бу диндан чиқиш эса, киришдан ҳам тез бўлади. Биргина сўзни инкор қилиш билан, ёлғонга чиқариш ёки қарши туриш билан бўлиши мумкин. Шунингдек, Аллоҳга нисбатан ёлғончилик қилиш, Аллоҳ таолонинг сўзига гумон билан қараш, Аллоҳ таоло нозил қилган нарсани рад қилиш ва шунга ўхшаган, сиртдан арзимаганга ўхшаган нарсалар билан бўлиши мумкин.

Муаллифнинг: "**Ҳаддан ошиш ва камчиликка йўл қўйиш ўртасидадир**" дегани ҳақида.

Ҳаддан ошишга, арабчада «ғулув» дейилиб, шариат қўйган чегарадан четга чиқишни билдиради.

«Камчиликка йўл қўйиш», эса «тақсийр» дейилиб, шариатда қўрсатилган чегарага етмасдан буюруқларни ва қайтаришлари тарк этиш билан бўлади.

Ислом ҳаддан ошиб, чегарадан чиқишни ёқтирамайди ва дангасалик қилиб, камчиликка йўл қўйишни жоиз кўрмайди. Балки, ўртача йўл тутади.

Далил:

1-»Сен: «Эй аҳли китоблар, динингиздан ноҳақдан ғулувга кетмангалар», - деб айтгин». (Моида сураси, 77)

2-»Эй иймон келтирганлар. Аллоҳ сизга ҳалол қилган пок нарсаларни ҳаром қилмангалар ва тажовузкорлик қилмангалар. Албатта, Аллоҳ тажовузкорларни севмас». (Моида сураси, 87)

З-Оиша розияллоҳу анҳодан ривоят қилинган ҳадисда қуйидагилар айтилади: Баъзи сахобийлар Пайғамбар соллаллоҳу алайхи васалламнинг завжай мутаҳҳараларидан У зотнинг сир амаллари ҳақида сўрадилар. Сўнгра уни оз, деб билдилар. Улардан бири, гўшт емайман, деди. Бошқа

бири аёлларга уйланмайман, деди. Яна бири, кўрпамда ухламайман, деди. Бу нарса Пайғамбар соллаллоҳу алайҳи васалламга етганида, У зот: «Одамларга нима бўлдики, бундок, бундок, дейдилар?! Лекин мен рўза ҳам тутаман, оғзим очиқ ҳам юраман, ухлайман ва бедор ҳам бўламан, гўшт ҳам ейман. Аёлларга уйланаман ҳам. Ким менинг суннатимдан юз ўгурса мендан эмас»-дедилар.(Бухорий ва Муслим ривоят қилганлар). 4-Аллоҳ таоло: «Намозни унитувчи намозхонларга ҳалокат бўлсин», (Моун сураси, 4-5) деган. Яъни, намоз ҳақида бепарволик қилиб, камчиликка йўл қўйиб, уни эсдан чиқарадиганларга ҳалок бўлсин, ҳолигавой бўлсин, дегани.

Муаллифнинг, «Ташбех»-ўхшатиш ва «Таътийл»-амалдан қолдириш-ўртасидадир» дегани ҳақида.

«**Ташбех**»-махлуқнинг сифатларидан бир сифатни холиқقا исбот қилишдир.

«**Таътийл**»-Аллоҳ таолонинг Ўзи ва Унинг Расули У зоти таолога исбот қилган сифатлардан бирортасини манфий (рад) қилишдир.

Аввал айтиб ўтилганидек, Аллоҳ таоло Ўзини Ўзи ёки Расули васф қилганидек, ўхшатмасдан васф қилинишини яхши кўради. У бизга ўхшаб эшитади, бизга ўхшаб кўради, каби гаплар айтилиши жоиз эмас. Шунингдек, Аллоҳ таоло Ўзини Ўзи ёки Расули васф қилганидек, таътийл қилмасдан васф қилиниши яхши кўради. У зот Ўзини Ўзи ёки У зотнинг энг яхши бўладиган зот, Пайғамбари васф қилган сифатлардан бирортасини манфий қилиб бўлмайди. Чунки, бу-таътийлдир. Аллоҳ Ўзи: «Унга ўхшаш нарса йўқдир. У ўта эшитувчи, ўта кўрувчи зотдир», (Шўро сураси, 11) деган. «Унга ўхшаш нарса йўқдир», (Шўро су-раси, 11) дегани «Мушаббиҳа» мазҳабига раддиядир. «У ўта эшитувчи, ўта билувчи зотдир», (Шўро сураси, 11) дегани, «Муъаттила» мазҳабига раддиядир.

Муаллифнинг «Жабр ва қадар ўртасидадир» дегани ҳақида.

Бу маъно ҳақида ҳам олдин гапириб ўтилган. Банда ўз ишлари ва гапларига мажбур қилинмас. Албатта, унинг гаплари ва ишлари, титроқ босгандаги ҳаракатга ёки шамол эсгандаги дараҳтнинг ҳаракатига ўхшаган эмасдир. Шунингдек, унинг гаплари ва ишлари унинг ўзи томонидан ҳалқ қилинган ҳам эмасдир. Балки, улар баданинг иши ва касби бўлиб, Аллоҳнинг яратгандир. Яратиш ва касб қилиш орасидаги фарқ олдин айтиб ўтилди. Муаллифнинг, «Амн»-(хотиржамлик)-ва «Ийас»-(умидсизлик) ўртасидадир» дегани ҳақида.

Бу маъно тўғрисида ҳам олдин сўз бўлиб ўтган. Банда доимо ўз Роббисининг азобидан қўрқиб, раҳматидан умидвор бўлиб, туриши лозим. Хавф билан умидворлик банданинг Аллоҳ томон юришида икки қанот

вазифасини ўтайди. Банда Аллоҳнинг макридан хотиржам бўла олмайди.  
Шунингдек, Унинг раҳматидан ноумид ҳам бўла олмайди.